

MICHEL FOUCAULT NIA HANOIN: PODÉR, SEKSUALIDADE, NORMÁL NO JENEALOJIA SABÉR NIAN

MICHEL FOUCAULT'S THINKING: POWER, SEXUALITY, NORMAL AND GENEALOGY OF KNOWLEDGE

Alessandro Boarccaech

Professor na Universidade Nacional Timor Lorosa'e

Recebido: 05 de maio de 2018
Aceito: 04 de agosto de 2018
Publicado: 17 de novembro de 2018

MICHEL FOUCAULT NIA HANOIN: PODÉR, SEKSUALIDADE, NORMÁL NO JENEALOGIA SABÉR NIAN

Alessandro Boarccaech*

Rezumu: Artigu ida-ne'e apresenta Michel Foucault nian konseitu prinsipál sira balu. Nu'udar pensadór prinsipál ida iha sékulu XX, Michel Foucault hakerek tiha livru no artigu barak ne'ebé ko'alia kona-ba podér, moras mental, seksualidade, lia-loos, kontrolu sosiál, saida maka hanoin normál no patolójiku, no hirak seluk. Iha primeira parte artigu ida-ne'e nian, ha'u apresenta faktu istória nian balu ne'ebé fó influénsia ba Foucault nia moris. Iha segunda parte, ha'u hakerek kona-ba ninia konseitu prinsipál sira, maka hanesan: dispozitivu, jenealogia sabér nian, lia-loos, episteme, seksualidade, isin-lolon, no hirak seluk.

Liafuan-xave: Michel Foucault; seksualidade; podér; jenealogia sabér nian; dispozitivu-sira.

MICHEL FOUCAULT'S THINKING: POWER, SEXUALITY, NORMAL AND GENEALOGY OF KNOWLEDGE

Abstract: This paper presents some of the main Michel Foucault's concepts. One of the leading thinkers of the 20th century, Michel Foucault has written dozens of articles and books addressing topics such as power, madness, sexuality, truth, social control, what is considered normal and pathological, among others. In the first part of this article, I present some historical facts that have influenced Foucault's life. In the second part, I explain some of his main concepts, such as: dispositive, genealogy of knowledge, truth, episteme, sexuality, body, among others.

Keywords: Michel Foucault; sexuality; power; genealogy of knowledge; dispositive.

Michel Foucault nu'udar pensadór prinsipál osidental ida entre pensa-dór hirak-seluk iha sékulu XX nian. Nia moris iha loron-15, fulan-outubru, tinan-1926, iha sidade fransa ho naran Poitiers no nia mate iha loron-25, fulan-juñu, tinan-1984 iha Paris. Ninia família nu'udar família médiku nian, maibé

* Profesor iha Universidade Nacional Timor Lorosa'e.
<https://doi.org/10.53930/27892182.dialogos.3.83>

Foucault hala'o estudu iha área istória, filozofia no psikolojia. Durante ninia estudu sira, Foucault lee tiha obra sira hosi Platão, Immanuel Kant, Hegel, Karl Marx, Friedrich Nietzsche, Sigmund Freud, Jacques Lacan, Max Weber, Heidegger, Jean Hyppolite, Louis Anthusser, Émile Durkhein, Franz Kafka no mós nia iha interese ba polítika, ba movimentu surrealista, ba psikanálize, no hirak seluk tan. Ita bele haree-hetan katak Foucault nia teoria hamosu hosi influénsia, estudu no leitura barak. Leitura ne'ebé nia halo la'ós leitura pasiva tanba nia la simu de'it saida maka nia lee tiha, maibé nia analiza, hanoin no kompara ho autór hirak seluk sira no kompara mós ho realidade ne'ebé nia rasik haree ba.

Maske nia nu'udar oan ida hosi família ne'ebé tradisionál no riku, Foucault nafatin haree ba dezigualdade iha sosiedade nia laran, violénsia, autoritarizmu, relasaun entre podér no deskriminasaun iha sosiedade leet. Nia mós nu'udar vítima ba deskriminasaun tanba nia homoseksuál no iha tempu ne'ebá relasaun sira *homo-afetiva* ema haree hanesan moras ida. Ida-ne'e sai hanesan razaun ida entre razaun hirak seluk ne'ebé lori nia, iha tinan-1953, sai hosi partidu komunista fransés, tanba nia lakohi hola-parte iha grupu ida-ne'ebé konsidera homoseksualidade hanesan vísiu burgézia nian no sinál hosi dekadénsia morál. Faktu seluk importante iha Foucault nia moris maka, bainhira ho tinan-22, nia sente deprimidu no sente katak ema sira la hatene nia, ho nune'e, nia koko atu oho-an no ninia pai hatama tiha nia ba ospital ba ema moras mental sira.

Buat sira-ne'e hotu fó kontribuisaun ba Foucault hodi hakerek ninia livru hamutuk 21, hakerek barak kona-ba artigu, prefásiu, introdusaun no kapitulu sira livru nian ne'ebé nia estuda kona-ba prizaun, manikómiu, sistema ensinu no nia halo análize ba saida maka normál, saida maka *loucura* (bulak), seksualidade, relasaun sira podér nian, punisaun, sistema sira hodi halo kontrolu sosiál no transmisaun sabér nian.

Foucault moris iha períodu entre Funu Mundiál I (1914-1918) no Funu Mundiál II (1939-1945). Iha tempu ne'ebá Europa hasoru hela períodu boot kona-ba ki'ak no dezigualdade iha sosiedade nia laran. Iha Alemaña, hafoin kedas ramata Funu Mundiál I, mosu *Partido Nacional-Socialista dos Trabalhadores* (Nazizmu) ne'ebé hakarak kondisaun di'ak ba povu, partidu ida-ne'e kontra ema-estranjeiru sira-ne'ebé hela iha paiz, defende teoria *espaço vital*, no, hakarak halo hamutuk hikas fali povu alemaun tomak iha território nia laran. Iha Itália, hasoru problema

Michel Foucault nia hanoin: podér, seksualidade, normál no jenealojia sabér nian

oioin kona-ba ekonomia, mosu tiha *Partido Fascista* ho hanoin antikomunista, kontraria ho ideia liberál sira no fiar katak Estadu ida forte no kontroladór maka nu'udar solusaun ba problema sira no dezigualdade ekonómika no sosiál nian.

Iha Funu Mundiál II Alemaña, Itália no Japaun forma *Eixo* no hasoru nasaun hirak seluk ne'ebé hanaran *Aliados*, ne'ebé primeiru forma hosi Inglaterra, França no depois ho Estados Unidos, União Soviética, China, Brazil no paíz hirak seluk tan. La iha estatística ida-ne'ebé loos, maibé tuir estimasaun ema mate besik milaun-60 durante Funu nia laran. Iha Timor-Leste mosu konfliktu sira liuhosi invazaun japonés nian iha 1942 to'o 1945. Iha tempu ne'ebá tropa olanda no australia nian, hamutuk ho kombatente timoroan sira, koko reziste hosi invazaun japonés nian. Gerrilleiru sira subar iha foho no rai-klaran hodi organiza rezisténsia no, maske la hatene loloos, iha kombatane ne'e timoroan mate besik rihun-40.

Funu Sivíl españól nian akontese iha tinan-1936 to'o tinan-1939. Iha tempu ne'ebá España hasoru difikuldade ekonómika no sosiál. *Frente Popular* ne'ebé forma hosi partidu eskerda no republikanu manan eleisaun sira. Maibe, forsa konservadora no elite sira iha paíz la simu lakon ne'e no akuza governu foun sei kauza inseguransa no koko atu harii governu socialista. Paíz fahe ba mai tiha, parte forsa-armada apoia Republikanu no parte seluk apoia Nasionalista. Igreja mós fahe ba rua ne'ebé ida apoia parte ida no ida seluk fó apoiu ba parte seluk. Iha *Frente Popular* nia sorin iha socialista, anarkista, operáriu, kamponés, sindikatu no partidu polítiku sira eskerda nian. Iha Nasionalista nia sorin iha monarkista ne'ebé hakarak Rei (*Liuurai*) fila fali ba podér no elite ekonómika paíz nian. Grupu rua ne'e kontra malu no ema rihun atus lima resin mate durante konfliktu ne'e. Foucault sei ki'ik iha tempu ne'ebá, maibé nia akompañia iha ninia aldeia haree deslokamentu ema refujiadu funu nian ne'ebé tama Fransa tanba halai hosi konfliktu.

Movimentu sosiál sira no konfliktu iha dékada 1960 mós fó impaktu ba hanoin Foucault nian. Entre kauza hirak-ne'e maka konfliktu sira iha Tunízia ne'ebé mosu iha 1966 no 1968. Iha tempu ne'ebá Foucault hanorin hela iha universidade Tunízia nian no partisipa iha protestu sira estudante nian kontra folin a'as no obrigatoriedade atu selu bis, maibé hafoin kontinua nafatin hodi reivindika kondisaun di'ak moris nian. Durante konfliktu sira entre estudante no polisia, Foucault hetan agresaun no ajuda subar ema barak iha ninia uma.

Movimentu maiu-1968 iha Fransa sai tiha nu'udar eventu importante seluk ida. Estudante fransés sira halo revolta hasoru dezigualdade sira-ne'ebé iha sociedade nia laran, kontraria Funu Vietnam, ho reivendika direitu sivíl ne'ebé hanesan no igualdade jéneru liuhosi halo protestu barak ne'ebé Governu reprimi tiha nomós polísia. Eventu sosiál sira-ne'e hamoris Foucault nia interese ba polítika ne'ebé halo nia partisipa ho ativa iha vida-polítika.

Entre influénsia teórica sira-ne'ebé nia simu tiha, ida maka estruturalizmu ne'ebé kria, iha inísiu sékulu XX, hosi linguista Ferdinand de Saussure. Pensamentu estruturalista sira iha dékada sira tuirmai adota tiha ba área-sabér hirak seluk, maka hanesan antropolojia, sosiolojia, psikolojia, psikanálize no filozofia. Ba estruturalizmu, realidade sosiál sei analiza liuhosi modelu sira-ne'ebé esplika relasaun sira (sosiál, psikolójika, linguística no hirak seluk tan). Modelu sira-ne'e buka atu identifika estrutura sira hanesan sistema abstratu ne'ebé faktu sira interliga ba malu (iha relasaun ba malu) no determina buat hotu-hotu. Ho liafuan seluk, la iha estrutura ida maka mesak, buat hotu-hotu iha relasaun ho estrutura seluk no determina realidade sosiál. Polítika, ekonomia, edukasaun, justisa sai nu'udar ezemplu hosi estrutura sira-ne'ebé iha relasaun ba malu no fó influénsia ba malu. Problema sira edukasaun nian bele hamosu problema polítiku; problema sira polítika nian bele kauza problema sira ba seguransa no ekonomia no hanesan ne'eba oin. Ema konsidera Foucault hanesan pós-estruturalista ida, maske nia la simu rótulu ida-ne'e. Ba Foucault, ninia traballu hanesan traballu arkeológu nian ne'ebé koko atu hatene kona-ba fundamentu sira no orijen hosi maneira oinsá ema hanoin no fiar ba buat ruma.

Tuir ideia prinsipál sira Foucault nian, iha konseitu kona-ba podér. Iha livru *Microfísica do Poder*, Foucault dehan katak podér maka relasaun forsa sira-nian ne'ebé iha fatin hotu-hotu no la iha fatin ka na'in ida rasik. Podér la ereditáriu ka transmiti liuhosi kontratu jurídiku ka polítiku. Podér funsiona hanesan rede ida, ka, nia transmiti no reproduz hosi ema sira liuhosi relasaun sosiál sira. Tanba ne'e maka ema sira iha pozisaun hodi ezerse poder ida-ne'e no sofre ba ninia asaun, ema sira nunca pasivu no nafatin nu'udar sentru hodi transmiti podér. Ema sira la iha poder rasik, maibé simu podér hosi ema seluk. Podér la'ós fenomenu dominasaun únika no omojénea hosi

ema ida ba ema seluk, hosi grupu ida ba grupu hirak seluk, hosi klase ida ba klase hirak seluk. Ho liafuan seluk, poder la moris ho ema sira, maibé forma no transmiti liuhosi relasaun sosiál sira. Ema ida sei iha poder se ema seluk fiar katak nia iha poder. Haktuir sosiedade sira, kultura no realidade hosi époka ida-ida, repodús poder ho forma oioin ne'ebé hatuur ba ema sira forsa ida ba ema seluk.

Parece-me que se deve compreender o poder, primeiro, como a multiplicidade de correlações de força imanentes ao domínio onde se exercem e constitutivas de sua organização; o jogo que através de lutas e afrontamentos incessantes as transforma, reforça, inverte; os apoios que tais correlações de força encontram umas nas outras, formando cadeias ou sistemas ou ao contrário, as desfasagens e contradições que as isolam entre si; enfim, as estratégias em que se originam e cujo esboço geral ou cristalização institucional toma corpo nos aparelhos estatais, na formulação da lei, nas hegemonias sociais. O poder não é uma instituição e nem uma estrutura, não é uma certa potência de que alguns sejam dotados: é o nome dado a uma situação estratégica complexa numa sociedade determinada. (Foucault, 1988, p. 89).

Atu ida-ne'e akontese, Foucault dehan katak eziste *arquitetura do poder* ida. Maneira oinsá harii ospital, prizaun, eskola, muzeum, monumentu, estátua, prédiu sira governu nian, no hirak seluk tan, kontribui ba ezerse poder. Arkitektura no dinámika interna instituisaun sira-nian reflata ba ema sira forma balu hodi sira atu lori-an. Ho liafuan seluk, iha tentativa hodi *dixiplina* maneira oinsá ema hanoin, sente no lori-an. Atu ida-ne'e funsiona presiza hamoris burokrazia no funsaun defnida sira. Ema ida-ida tenke dezempeña ninia servisu hodi mantein sistema poder ne'ebé la'o hela. La bele domina ka ezerse poder liuhosi de'it forsa fízika, bele kontrola liuhosi ema nia asesu ba informaun, ba bein sira konsumu nian, ba hahan, ba saúde, ba edukasaun no hirak seluk tan. Porezemplu igreja sira harii ho kakuluk ne'ebé aas hodi hanoin hikas fali ema sira katak sira nafatin ki'ik bainhira hela besik Maromak; iha sekretaria no departamentu balu governu nian iha janela ki'ik-oan ne'ebé ema sira la konsege haree funsionáriu ne'ebé halo hela atendimentu, ka presiza hatun hodi ko'alia ho funsionáriu, ida-ne'e hatudu divizaun entre sé mak iha poder hodi desidi buat ruma no ema/povu ne'ebé la iha poder no presiza hein.

Foucault durante dékada 1960 hakerek livru *O Nascimento da Clínica* (publika iha 1963), *As palavras e as coisas* (iha 1966) no *Arqueologia do saber* (iha 1969). Iha livru sira-ne'e, Foucault apresenta ninia métodu peskiza ne'ebé hanaran *Arqueologia do saber*. Liuhsosi *Arqueologia* Foucault koko kompriende formasaun diskursiva no *episteme* ne'ebé kontrola no regula maneira oinsá ema sira koñese mundu, formula teoria, determina regra sosiál no ida-ne'ebé maka ema bele koñese no la bele koñese. Ida-ne'e nu'udar métodu ne'ebé estuda períodu istóriu espesífiku sira. Liuhsosi análize ba jornál, rejistu, manuál, livru, pintura no hirak seluk tan, nia koko atu kompriende padraun sira diskursu nian ne'ebé influensia maneira oinsá ema hanoin no halo asaun. Hala'o estudu ba dokumentu sira-ne'e, kona-ba forma oinsá ema hanoin no halo buat ruma iha pasadu, haktuir Foucault, nu'udar importante atu ita kompriende sosiedade ohin-loron nian.

Hafoin, iha dékada 1970, Foucault hahú uza konseitu seluk ne'ebé hanaran *genealogia do saber*. Konseitu *genealogia do saber* kria tiha atu haluan konseitu *arqueologia do saber*. Konseitu ida-ne'e inspira hosi Nietzsche ne'ebé afirma katak relasaun sira podér nian fó influénsia ba atividade hotu-hotu ema nian no lia-loos la'ós buat ida-ne'ebé pruntu ona no la bele muda, maibé buat ne'ebé ita tenke kria mesak. Umanidade nu'udar forma ida estrutura sosiál nian ne'ebé kria hosi forsa kultura nian ne'ebé hetan hela de'it mudansa. Nietzsche utiliza tiha konseitu *genealogia do saber* atu deskreve estudu sira kona-ba evolusaun no motivasaun sira konseitu morál nian. Foucault uza termu *genealogia* atu analiza istória kona-ba *saber* barak hanesan literatura, medisina, moralidade no hirak seluk tan.

Genealogia ne'ebé Foucault propoin la iha objetivu atu konta istória ho forma lineár, maibé atu buka hatene akontesimentu sira iha époka ruma no ninia singularidade. Ba ne'e, nia foka ninia análize sira kona-ba sabér no maneira sira koñesimentu lokál nian, ne'ebé la rekoñese, sai marjinalizadu. Liuhsosi forma ida-ne'e nia la ko'alia kona-ba istória formál ne'ebé ema konta hosi ema ne'ebé iha podér, maibé istória oinsá grupu hirak-ne'ebé la bele ko'alia sira-nia vizaun istória ne'ebé sira moris tiha ba. Nune'e, lia-loos istória nian ne'ebé konta iha livru no manuál sira kontesta ho versaun hirak-ne'ebé la mosu iha livru sira istória nian.

Ba Foucault iha tipu tolu *genealogia*: ida, *genealogia histórica* kona-ba ita rasik no ita-nia relasaun ho signifikadu lia-loos nian; ita-nia relasaun ho podér ne'ebé halo ita influensia ema seluk; ita-nia relasaun ho morál ne'ebé determina ita-nia relasaun ho étika. Relasiona ho *genealogia* ita bele utiliza ezemplu konseitu jéneru nian. Bainhira hala'ó estudu jeneolójiku ba kategoria jéneru nian la'ós atu buka lia-loos ida, ka esensia hosi saida maka jéneru, maibé atu hatene maneira oinsá ita hanoin kona-ba oinsá jéneru ne'e forma tiha, ho identifika diskursu hirak-ne'ebé sai dominante no diskursu hirak seluk ne'ebé haluha tiha durante istória.

Lia-loos determina fali hosi diskursu sientífiku ka hosi instituisaun sira (grupu, sistema ierárkiku) ne'ebé kontrola podér. *Lia-loos* dala barak podér polítiku maka uza (governu no podér lokál) hodi dehan saida maka ema tenke fiar. *Lia-loos* habelar iha sosiedade liuhosi sistema edukasaun (eskola no universidade), média (jornál, televizaun, rádiu, nst), instituisaun sira seguransa nian (forsa-armada no polísia), literatura (orál no hakerek), polítiku, kultura (saida maka ita tenke halo), no hirak seluk. Foucault estuda kona-ba sistema lia-loos nian hosi sosiedade ida atu hatene oinsá lia-loos ne'e kria tiha no “lia-loos” hirak-seluk ne'ebé sei subar hela, nonook ka haluha tiha.

Ba Foucault nosaun *lia-loos* nu'udar kriasaun/invensaun no depende ba presupostu no tendénsia hosi ninia époka. *Lia-loos* ida-idak nu'udar partikulár no deskreve de'it realidade ida-ne'ebé hanoin tiha ba. Maske *lia-loos* aprezenta falla sira, maibé mantein kontrolu ba ema sira, ema kontinua fiar *lia-loos* ne'e. Porezemplu, se ha'u fiar relijiaun ida, entaun buat hotu ne'ebé relijiaun ne'e dehan sei sai lia-loos mai ha'u, no relijiaun sira seluk sala. Ka, se ita iha prekonseitu kontra feto sira, entaun bele nu'udar lia-loos mai ha'u katak feto sira inferiór ba mane sira. Ezemplu seluk, se ha'u hanoin katak edukasaun tenke liuhosi meu kastigu no autoritarizmu, entaun bele sai lia-loos mai ha'u katak labarik sira iha kompriensaun hanesan kona-ba mundu no kapasidade rasiósíniu adultu sira-nian, no bainhira halo buat ruma sala tenke hetan kastigu.

Ida-ne'e lori ita ba konseitu seluk ne'ebé Foucault elabora tiha, ka, *episteme*. Haktuir Foucault *episteme* nu'udar estrutura pensamentu no presupostu ne'ebé representa hanoin no fiar hosi époka espesífika ida. *Episteme* halo ligasaun entre diskursu sientífiku ho lia-loos hosi époka ida nian. Ba Foucault la ezisti *episteme* ida de'it – no *episteme* la'ós nu'udar soma hosi diskursu sira

époka ida nian –, maibé nia representa relasaun entre sistema oioin ne'ebé hadau podér. Hanoin tiha katak *episteme* ne'e atu deskreve disputa sira no sistema sira iha área diskursu nian, maibé sei falta atu hatudu katak ida-ne'e la akontese tiha iha moris loron-loron no iha ema nia hahalok.

Nune'e, Foucault avansa ninia teoria no propoin konseitu *dispositivos*. *Dispositivos* nu'udar *discursivos* no *não-discursivos*. *Episteme* sai fali parte ida hosi *dispositivo do discurso*. *Diskursu* nu'udar koñesimentu lubun ida kona-ba *episteme* ida no kualkér sistema koñesimentu sempre relaciona ho modifikasaun ida iha sistema podér nian. Tuir Foucault *dispositivos* nu'udar meu, forma, dalan, ne'ebé liuhosi sira podér bele ezerse iha sociedade. Ho liafuan seluk *dispositivos* nu'udar mekanizmu no estratejia ne'ebé uza tiha hodi realiza objetivu balu. *Dispositivos* funsiona hanesan rede ida-ne'ebé buka kontrola liuhosi forma rua: a) liuhosi diskursu koko atu kontrola saida maka ema sira hatene katak normál, morál, loos no sala no nst.; b) liuhosi meteriál/konkretu (*não-discursivo*) koko atu kontrola saida maka ema sira bele halo, hatais, han, fatin ne'ebé atu bá no nst. *Dispositivos* la'ós fiksi, maibé muda tuir tempu no tuir objetivu hirak-ne'ebé atu hakarak hetan. Tuir Foucault nia hanoin *dispositivo* hanesan:

(...) um conjunto decididamente heterogêneo que engloba discursos, instituições, organizações arquitetônicas, decisões regulamentares, leis, medidas administrativas, enunciados científicos, proposições filosóficas, morais, filantrópicas. Em suma, o dito e o não dito são os elementos do dispositivo. O dispositivo é a rede que se pode tecer entre estes elementos. (Foucault, 1979, p. 244).

Iha *dispositivos* tipu oioin, hanesan ezemplu konfisaun iha relijiaun, padraun estétiku hirak-ne'ebé kontrola moda, regra sira kona-ba seksualidade, norma hirak-ne'ebé determina maneira oinsá ema estuda, maneira oinsá ema tau kuidadu ba ninia saúde, no hirak seluk. Foucault iha ninia livru *Vigiar e Punir* ko'alia kona-ba *dispositivos Vigilância* no *Punição* nian. Governu, prizaun, eskola, manikómiu, forsa polísia no hirak seluk tan uza *vigilância* hanesan maneira ida atu kontrola no obriga ema sira halo saida maka grupu sira-ne'ebé iha podér determina. *Vigilância* envolve aspetu ekonómiku no polítiku sira. Ekonómiku tanba presiza materiál no ema sira atu halo vijilánsia. Polítiku tanba se vijilánsia hamosu violénsia sei bele hamosu runguranga iha sociedade. *Dispositivo da punição* nu'udar prosedimentu sira burokrátiku nian ne'ebé es-

Michel Foucault nia hanoin: podér, seksualidade, normál no jenealojia sabér nian

tadu ofisializa punisaun, kastigu. Estadu konsentra direitu atu ezerse violénsia no determina saida maka bele halo hodi fó kastigu, korriji, eduka filafali no fó kastigu ba ema sira-ne'ebé kontra regra. Liuhsosi vijilánsia no punisaun, grupu sira-ne'ebé iha podér koko atu kontrola sosiedade.

Ba Foucault *sujeito* la'ós buat ida-ne'ebé úniku, hotu tiha ka moris mai pronto kedas. Ideia kona-ba *sujeito* harii ho istória no época ida-idak iha konseitu ida kona-ba saida maka signifika sai *sujeito*. Ka, maneira oinsá ema sira hatene no defini sira-nia maneira hodi hanoin. Bainhira época no fatin muda, ideia kona-ba *sujeito* bele mós muda. Ho ida-ne'e, *subjetividade*, ka, maneira oinsá ema moris, sente no hatene nia an rasik hola-parte iha *jogo de verdades* ne'ebé formasaun *sujeito* nian la halo tiha bazeia ba esénsia ema nian, maibé liuhosi prátika, esperiénsia, dixiplina no disputa ba podér iha sosiedade. Disputa sira kona-ba podér iha sosiedade halo indivíduu tenke adota buat ne'ebé konsidera normál ka komún. *Corpos dóceis*, hanesan Foucault ko'alia, nu'udar ema sira-ne'ebé submete ba kontrolu hosi lí'ur kona-ba saida maka tenke sai, halo ka hanoin.

Tuir Foucault, iha ninia livru *História da Loucura*, buat ne'ebé ema sira hatene nu'udar *loucura* muda tuir tempu. Nia hakarak hatene kona-ba orijen sira-ne'ebé haketak *loucura* hosi razaun. Foucault afirma katak iha época medieval ema bulak sira lao iha dalan durante loron, konsidera sira hanesan sagradu no la haketak hosi sosiedade. Maibé, hafoin Descartes, razaun sai fali baze ba pensamentu hotu-hotu no ba koñesimentu. *Loucura* sai fali *des-razão* (la'ós razaun) no izoladu, subar no kaer iha ospitál ka fatin ba ema moras mentál. Ba Foucault, *des-razão* maka buat hotu ne'ebé halai sees hosi norma, la korresponde ho padraun sira no la adapta ba rasionalizmu sosiedade kontemporánea nian. Nune'e, família sira sente moe no hasees-an hosi ema hirak-ne'ebé konsidera hanesan ema-bulak. Foucault mós afirma katak razaun kria diskursu kona-ba *loucura*, determina saida maka normál no patolójiku. Nu'udar faktu hanoin la hanesan ho ema maioria sira konsidera tiha hanesan sinál bulak nian. Atu konsidera hanesan ema normál, ema tenke hanoin no lori-an tuir padraun sira normalidade nian ne'ebé impoin hosi grupu hirak-ne'ebé iha podér.

Tema seluk ne'ebé Foucault estuda tiha maka seksualidade. Ba ida-ne'e, nia hakerek livru tolu kona-ba *A História da sexualidade*. Ho ne'e, Foucault

hakarak kompriende oinsá prátika, diskursu relijiozu, sientífiku, polítiku, ekonómiku, morál no étiku fó influénsia ba maneira oinsá ema hala'o seksualidade. Foucault dehan katak *sexo* iha sosiedade kristaun transforma tiha ba asuntu ida-ne'ebé presiza vijia, kontrola, konfesa no sai diskursu. Siénsia sira determina katak saida maka seksualidade di'ak no moras, relijiaun kondena tuir morál, polítika iha responsabilidade atu kria lei no punisaun ba saida maka konsidera seksualidade-moras no hirak seluk tan. Iha tempu barak nia laran la autoriza ema atu ko'alia kona-ba seksualidade, maibé bandu atu ko'alia, kondena ka reprimi. Sosiedade sira prodús *discursos verdadeiros* atu ema hotu-hotu aseita no, kona-ba seksualidade, promove represaun seksuál, diskriminasaun kontra feto, kontra homoseksuál, ema sira ho problema jenétiku, no hirak seluk.

(..) é através do isolamento, da intensificação e da consolidação das sexualidades periféricas que as relações do poder com o sexo e o prazer se ramificam e multiplicam, medem o corpo e penetram nas condutas. E, nesse avanço dos poderes, fixam-se sexualidades disseminadas, rotuladas segundo uma idade, um lugar, um gosto, um tipo de prática. (Foucault, 1988, p. 48).

Maneira oinsá ema relaciona ho *corpo* (isin-lolon) muda tuir tempu. Foucault dehan katak iha momentu ida maka isin-lolon nu'udar tiha fatin suplísio nian ne'ebé tenke hetan kastigu hodi lori virtude ba klamar. Depois hasai tiha isin-lolon, aprisiona isin-lolon no hanorin isin-lolon atu iha autokontrolu. Ema sira-nia relasaun ho isin-lolon alterna kastigu no enklauzumentu atu koko eduka, korriji no fó kastigu. Atu kontrola ideia ne'ebé ema sira iha kona-ba isin-lolon no maneira oinsá sira relaciona ho isin-lolon maka kria tiha *dispositivos* oioin hodi halo kontrolu.

Nu'udar ezemplu maka bele kontrola isin-lolon ho afirma katak isin-lolon ne'e la puru no halo ema moe hodi hatudu nia; bele dehan katak ema ida nia isin kór di'akliu ema seluk nian, ne'e kria diskriminasaun étnika; bele kontrola saida maka ema han no ida-ne'e afeta kedas ba kresimentu no isin-lolon nia saúde; bele obriga estudante sira atu uza ropa ruma no hatudu hahalok maneira ne'ebé determina ona; bele dehan katak feto nia isin la prepara ba servisu balu; bele dehan katak feto (iha isin ne'ebé la hanesan ho mane) nu'udar inferiór ka iha servisu balu de'it tanba nu'udar feto;

Michel Foucault nia hanoin: podér, seksualidade, normál no jenealojia sabér nian

atu hanorin labarik sira bele uza kastigu ba isin-lolon, halo sira tauk atu la konkorda ho autoridade no hatudu saida maka sira hanoin. Ho liafuan badak, atu kontrola ema nia isin-lolon grupu hirak-ne'ebé iha podér bele kontrola sosiedade.

Tuir ida ne'e ita bele hatene katak Foucault nia obra nu'udar kompleksa no ninia konseitu sira iha livru no artigu sientífiku oioin. Michel Foucault, hamutuk ho Max Weber, konsidera nu'udar teóriku prinsipál ida entre hirak seluk ne'ebé ko'alia kona-ba podér iha sékulu XX. Lee kona-ba Foucault nu'udar importante ba sé maka estuda sosiedade, relasaun sira podér nian, kestaun sira kona-ba jéneru, seksualidade, forma sira ba kontrulu sosiál no maneira oinsá ideia sira transmiti hosi jersaun ida ba jersaun seluk.

REFERÉNSIA

Foucault, M. (1979). *Microfísica do Poder*. Rio de Janeiro: Graal.

Foucault, M. (1988). *História da Sexualidade I: a vontade de saber*. Rio de Janeiro: Graal.

Foucault, M. (1999). *Vigiar e Punir*. 20 Ed. Petrópolis: Vozes.

Foucault, M. (2010). *A ordem do discurso*. São Paulo: Loyola.

Foucault, M. (2014). *História da Loucura*. São Paulo: Perspectiva.

Direitos Autorais (c) 2018 Alessandro Boarcaech



Este texto está protegido por uma licença [Creative Commons](#)

Você tem o direito de Compartilhar - copiar e redistribuir o material em qualquer suporte ou formato - e Adaptar o documento - remixar, transformar, e criar a partir do material - para qualquer fim, mesmo que comercial, desde que cumpra a condição de:

Atribuição: Você deve atribuir o devido crédito, fornecer um link para a licença, e indicar se foram feitas alterações. Você pode fazê-lo de qualquer forma razoável, mas não de uma forma que sugira que o licenciante o apoia ou aprova o seu uso.

[Resumodalicença](#) [Textocompletodalicença](#)